



By 2020 we rise up

Interregionale Klimademo am 11. Januar 2020

S`letzte Johr esch es ereignissrichs Johr gsi, voller Ups and Downs. Bi all denne guete Sache wo passiert send, wie zum Bispel, dass d`Bewegig mega gwachse esch ond s`Thema ir Gsellschaft achoh esch, send mer leider ou med vell Messgonscht ond Ablehnig konfrontiert worde. Trotz dem Negative hed sech das was als chlini Brise agfange hed in relativ chorzer zit zomene Storm entweckelt. Dank üch ond tusige andere Lüt weltwit hei mers gschafft es leider chum beachtets Thema global zverbreite ond is bewostsi vo jedem zrüefe egal öb diejenige das hend welle wohrha oder ned. Lönd mer jetzt dä Storm sech witer lo entweckle ond zomene Orkan lo werde. Dorch d`Entwecklig vom Storm zom Orkan werde hoffentlech ou die letzte, wo sech vor dere Wohrheit verstecke begriffe, dasses höchsti zit esch, jetzt zhandle. Kämpfe mer jetzt drom, dass sech dä Orkan zore weltwite Veränderig vor Politik ond Wertschaft cha entweckle.

I der Politik hed sech zom glöck jetzt i de Schwiz scho einiges do. Im Oktober si, wie der äüä alli wösset, Wahle gsi ond wie der wahrschindlech ou alli gse heit, esch s`resultat sehr eidütig usgfalle.

D`Mönsche wend en Veränderig gse. D`Mönsche vo de Schwiz hend es Zeiche gsetzt. Se wend, dass jetzt aktiv öppis gege mönschlech verursacht Klimawandel onternoh wird.

Es esch ganz klar, dass üsi Gsellschaft weg vo dem Konsumwahn ond dere Wegwerfsgsellschaft weg wett ond sech zore verantwortigsbewosstere ond nachhaltigere Gsellschaft well entweckle.

Ou wenn ir Bewegig ond ir Politik jetzt scho so vell passiert esch, mösse mer jetzt ersch richtig afoh ond witer drock mache, uf d`Strosse go ond vör üsi Zuekonft kämpfe. Im Johr 2020 müesse mers schaffe 13 % vo allne Treibhausgasemissione z reduziere demet mer Netto 0 bis 2030 erreiche ond somet s Usmass vo de Katastrophe chöi idämme. Löit üs das Fundament wo mer erreicht hei nötze om d Klimakatastrophe abzwende.